

澤雅堂詩二集

澤雅堂詩二集卷三

烏程施補華均父著

魏午莊觀察光燾索柳湖書院詩

我攜一長劍萬里游空同
昆夷此舊壤子弟材力雄
勿誇材力雄四野銷兵烽
朽我重英矛棄我十石弓
媿茲戎羌習滌以弦歌風
不見柳湖陰學舍藏蔥蘢
書聲達宵旦略與鄒魯同
誰爲邦人謀偉哉邵陽公
蜀俗昔獷悍教化由文翁
遙遙千載後賢吏希其蹤
生才不擇地蕙草抽棘叢
吁嗟皇甫謐高節凌華嵩
我家傍吳越古在蠻夷中
詩書濯荒陋士女多昌丰
勉矣諸生徒儒術

知所宗勿負賢吏心息馬事鼓鐘

節園紀事

爲園豈獨樂衆樂良有時仲夏草木長開戶任游嬉人
士于于來赴此三日期或登阜閒亭或俯林下池縱橫
度菜隴迤邐穿花籬烈妃謁餘廟義士瞻新祠文字相
公作淋漓書之碑東閣詆蕩蕩行馬亦不施軒窗絕塵
翳洞達俱可窺人言相公至赤舄行遲遲鐵面眼有稜
偉哉天人儀藹然一顧問和若春風吹老人年百六扶
杖來觀之大耄始及游輸彼黃口兒吳興有下士紀事
作此詩聊代民歌謳拙直無諛詞

雁

金城四月猶唳雁邊月
荒荒照影寒似爾孤飛毛羽弱
近天容易避風難

坐一繫亭

小雨初晴嫩日斜
園林四月足清華
飄茵墮溷渾無定
閒看東風轉落花

章澹甫所居銀杏歌

地爲南宋王南強容
故居杏其園中物也

羅仙山下蒼雲滿
老樹幢幢映池館
高柯大幹八百年
不見王容見章坦
王容矯矯狀元郎
讀書樹底先老章
古人今人自感慨
斤斧不到天年長
憶容已死坦未生

此樹突兀撐空青山精野魅日倚嘯常愁寂歷無書聲

坦也表章殊好事曾文

文正

顧畫

穎樵

何髯字

子貞

飛

來瘦鶴古鬼魂樹頂徘徊毛色異吳興城裏長橋側銀
杏參天子昂植至今傍樹多貧家但解年年飽秋實坦
也對樹如對人遠游別樹還傷神城頭邊月照題畫獨
夜哀歌驚四鄰

顧穎樵畫山水尺幅爲陳芋僧題

西游度秦隴萬里思江南蒼然老屋底忽湧江南山兩
崖灑氣集天半青巉巉叢祠倚絕壁孤塔橫浮嵐下有
黃葉林蕭颯秋風酣林陰數十步草舍相回環臥君瀟

湘上置我茗雪閒何啻絕大江浩蕩扁舟還揮手謝簿
書散髮凌煙巖歸吟山中廬魂夢清無慚風吹短後衣
組練方西戡太息對此畫林壑徒幽探

不寐

攪夢方蟻蝨俱愁況雨風心煩千事聚漏急五更終慚
愧耕夫後蹉跎食客中寶刀芒作作問爾爲誰雄

雨夜

城頭哀角夜漫漫細雨疏鐙燄欲殘遠客乍回千里夢
新秋已占五分寒危時將相籌邊急今代麒麟畫我難
一笑明朝寄鄉信臨流端整釣魚竿

金城秋感

長河東下我西來城闕秋生旅思哀八陣風雲隨使節
十年詞賦媿邊才尊前人被黃花笑鏡裏應憐白髮催
夜夢忽揮千騎卻短衣清嘯上龍堆

天文煜煜將星明指顧西陲洗甲兵酒郡初開籌筆驛
蔥河還築受降城高秋轉粟鳴駝健枯磧飛泉飲馬清
敢棄珠崖如漢代

五朝神聖幾經營

天山何日息煙烽依舊乾嘉盛世逢盡變衣冠歸漢俗
平分郡縣拓秦封金錢仍喜洪鑪鑄寶玉無勞內府供

聞道豐碑書五體混同江畔問從容

回首樓臺蜃氣中東南濤浪接天空嫚言未肯歸王會
奇器徒聞鬪鬼工馬蹟怒爭江路險鯤身橫截海門雄
旌旗十萬連形勢和議分明寓戰功

紫竹林前碧海波年來風定狎蛟鼉北門鎖鑰公侯貢
南國帆檣梗稻多九譯語言通格磔三霄宮闕瞰嵯峨
天魔舞近通明殿玉狗鴻龍奈爾何

隴樹秦雲萬疊山故鄉遙在女牛閒空同長劍猶堪倚
茗甯扁舟且未還猛氣自疑青兕化壯年難伴白鷗閒
閨人似笑沙場近宵夢時時度玉關

獨鳥西飛瘁羽毛心長力短暮天高稻梁其戀謀生易
風雨誰憐擇木勞接葉巢深容鶴病隔林弓燥怯鳥號
何當勁骨經霜雪一助寒原搏擊豪

羌笛胡笳變凱聲旅葵越雉見夷情荒餘地氣偏宜穀
劫盡天心亦厭兵新月照空雙闕朗大風吹垢萬方清
小儒甘向田園老日作謳歌答太平

送羅孟威長祐出塞

孟威爲羅忠節再傳弟子

羅山門下半知兵揮斥東南巨寇平家學再傳唯寶劍
邊烽未息更長纓宵寒萬馬嘶風立春盡三軍鑿雪行
一笑天山崖壁上銘功還待老書生

中秋月

我家東海上明月是鄉親
慰此中秋夕來依萬里人
冷疑含客思清不混邊塵
闔閣停刀尺應知淚滿巾

張雲心太守承變述其母夫人教子事是亦余之所痛也作二詩贈之

一掬孤兒淚天涯我與君
賤隨人俯仰老負母恩勤
勸學憂時過嗚機待夜分
春暉難再得小草戀餘薰

羲和叱馭回去日儻重來
虛室憐孤影遺書付兩孩
淚因逃學墮顏爲賦詩開
老大虛期望何辭告夜臺

送雲心牧肅州

讀書拙爲政終坐未讀書古來循良吏經術殊不疎政
拙猶自可政巧聖所誅典籍出商販噫嘻小人儒得郡
六親喜債券非官符斂聚民脂膏我田成上腴官途多
智士幸君存其愚跨驢況臨關牧此兵燹區溝中起餘
喘皮骨嗟久枯誰能母字子但視雞狗殊擇肉食不忍
民已歌來蘇美政今龔黃古人焉可誣事半功則倍時
勢誠然歟痛乎莊生言發冢爭取珠送君爲此詠字與
涕淚俱願君勿示人咄咄遭怪迂

贈董研樵觀察

我從太行來羣峭青摩天磅礴一千里氣勢爭回旋下

有汾水流洶湧波濤寬迤邐及河東廣陌連平川山水
此一豁積氣常蜿蜒秋雲何縹渺但對姑射山疑有豪
傑人磊落生其閒抑或神仙儔文字奇而妍藹藹董洪
洞弱歲參清班東南數名輩學術誰能先頻年服獬豸
舊侶辭鸞鷲驅車過里門慕此今代賢萬里金城中始
識春風顏道尊敵官貴神壯忘形孱話彼蓬萊游貽我
瓊瑤篇自來逃空虛足音喜楚然何況九苞鳳翩下青
雲端遇公如夙昔送公秦州還依然山水窟著此神仙
官室虛書卷富吏散琴聲閑著成等身書卓犖千春傳
文章曜天地亦作旂常觀而我鬢鬢蒼憔悴親戎旃將

騎疥駱駝西出嘉峪關
椎冰渡蒲類鑿雪登祈連
功名歸猛士不屬儒
生酸壯游二萬里伏案嗤螢乾
新詩裂吹笛奇器凌控弦
歸攜塞上作慷慨歌公前東馳度太行
投老江湖邊

問月

夜靜四無人明月在庭戶
寒輝清我心偶與明月語
月從滄海來海水今幾許
迷離蜃氣中誰是樓臺主
鯨波疑絕天蛟涎或如雨
蓬萊風震盪愁絕神仙侶
射蛟可有人逆浪張強弩
揚舳更捕鯨鱗鬣供礎斧
問月月無言飛霜溼金鼓
長庚指東南作作光芒吐

余二田澤春湘江垂釣圖

君家七里瀨近與釣臺鄰
桃花無數春水闊鱗魚尺半
翻紅鱗羊裘老子休相笑
遠客天涯亦垂釣一竿偶拂
瀟湘波葦閒漁父呼同調
十年作吏幾時聞擊鷺提鷗
放棹還畫裏九疑雲縹緲
歸心認作富春山

乙亥九日風雨有感

風雨重陽節尊前感歲華
鄉書勞白雁詩興負黃花
雲卷祈連帳星明博望槎
功名垂異域可抵早還家

節園采菊

節園黃菊吾有緣
去年看盡還今年
幾日淒風坼寒蕊

羣花的的霜中鮮窮陰凜冽汝不受破除秋槁回春妍
疏籬老圃隨處好爲我吐秀戎羌聞一枝手折更三嗅
愛汝芳烈生孤寒小餅活水久供奉崢嶸晚節增慕歎
答袁子菁徵楷

一賦邊城菊吾知袁子菁歲寒同有感詩好轉無名高
節偏羈旅幽花失性情東籬容避世今古幾淵明

題壽陽祁文端遺札及詩後

涇陽徐太常熙菴與文端爲石交太常早卒追其孫
初菴太守應禮部試謁文端京第文端感念故人致
書董園公董園公太守之父也並留太守第中時有

倡和今年太守西來依今相國左公左公太常典試
湖南所特拔士也又與文端相厚因題卷首申繾綣
之義太守命予題其後

羣紀交游義最高八行鄭重自揮毫回思舊侶如鸞鳳
卻喜諸孫得羽毛多病尙憂當世事新詩聊助少年豪
壽陽淪謝湘陰歎老眼摩挲望更勞

贈徐訥安韋佩

混俗敢擇交深淺心自許肝膽隱相傾遲回出眞語蹈
尤本怯對聆善遂猛取墮地爲今人爾我誼猶古良醫
活人多不治一身苦風詩詠他山攻錯誠有補求容重

百茹獲諒輕一吐威夷濁世間直道庶交輔

功名逐豪傑攜劍爭西來驥心而驚足我愧追風才退
然羣英閒見拙翻忘猜勤勤君子心文莫以爲期歲暮
霜雪零置酒臨高臺鵬鶚擊煙表凡鳥鳴徘徊淬厲出
鋒穎頑鈍當何爲處囊不見末吾自尤吾錐

和同兩不辨吾亦求容身遙遙青雲端乃在方寸心外
物誠可慕但恐亡我真物至我已喪自待良非珍辭榮
古所難憂辱期無侵逃汗席已貴息潔相與深何以贈
君子理我囊中琴猗猗幽蘭操激激寒泉音

送鄧子柔光補

日歸日歸歲云暮亂雲急雪西風怒鄉心已挂瀟湘棹
玉帳牙旗上將營千山立馬頻回顧

厚我厚我宵相過疎鐙細雨聞高譟古誼更比今情多
揮手東西各千里飛飛勞燕心如何

蒼蒼涼涼一椽屋廣文先生甘苜蓿濛濛庭草和煙綠
短衣匹馬笑征人朝日浮窗春睡熟

猛氣我與天山高殺賊忽出鞞中刀黃河喋血飛紅濤
不然長揖返田里疲驢破帽吟煙臬

雪夜同周子巖崇傳及訥安作

軟裘能敵朔風尖笑語深宵雪滿檣士有邊才常慷慨

詩如兵律最森嚴
甌波泛綠茶初熟
爐火回紅炭乍添
十萬軍中安枕席
吳儂不換夢魂甜

酬嚴紫卿金清

紅毛城外海如杯
親見扶桑曉日開
纔向鯤身挂帆去
又從龍尾看山來
邊聲迸入西風壯
詩興偏勞暮雪催
隴樹千重家萬里
酒闌脫劍意徘徊

同詎安訪阿公祠張道士并柬子巖

富貴著人如醉夢
道人醒眼應悲痛
卻從醉夢笑道人
十日關門忍飢凍
我醉未熟夢未甜
時接清言識微諷
淒淒風雪城西隅
騎馬追尋與君共
阿公祠宇柏蕭森

噓噓寒禽發幽哢道人有道人不知埽地焚香隨伴衆
倏忽無功渾沌全一卷南華老吟誦孤鶴層霄縹緲心
慚愧醯雞方舞甕偶然物外念塵中熱惱有根嗟自種
道人軟語澈中邊客自多才我無用

從軍詩

丙子

儒冠不我戀慷慨歌從軍從軍向玉關旌旆連長雲花
門勿狘猖元帥武且仁行師期止戈衛霍安足云帳下
貔虎兒雄猛無與倫刀劍各在腰飲馬黃河濱我弱敢
獨將摹畫時有陳昔我游京師浩蕩

天衢春晨登

紫光閣長揖諸功臣森然毛髮動貌狀皆天人公等已
千秋我亦昂藏身風塵方瀕洞攜劍思奇勛他年雪色
壁抑或圖我真請纓遂夙志出塞當茲晨天山橫我前
冰雪高嶙峋磨治一片石待我銘功文

五朝倦西顧赫然興雄師府庫出千萬昇作芻糧資羣
臣請罷兵天討

帝不疑侮亡而取亂亦曰安集之開拓二萬里建官以
分治伯克爾所主謨罕爾所歸舊俗苟可治不強中國
爲制彼犬羊性禮法稍稍持中葉忽小梗撻伐臣宜施
蔥嶺非珠崖勿襲君房辭

祖宗御黃屋風雪臨邊陲子孫況神聖誰敢言棄遺戰
士多如雲莽盪交龍旂洗兵向河源執俘歸

帝堦上慰

列聖心下以威諸夷

西陲二萬里

皇輿誠遐悠哀哉皆吾民迫脅成賊讐賊讐甯不誅但
願知其由叨逢方召帥屠戮仍涕流千駝紛轉粟萬里
爭踰溝三匝烏孫城飛鳥徘徊愁天驕亦人類忍視羊
與牛稽首崩厥角湯網終寬求痛自取滅亡

帝怒天爲秋大臣扞邊患豈計公與侯功成軍吏賀饒

吹喧荒州吁嗟兵死鬼晝哭陰山頭

軍發蘭州

黃河冰破裂洶湧喧春濤春濤不可涉造舟以爲橋大
將西出師笳吹臨河皋萬馬橋左右羣飲鳴蕭蕭飲馬
上坡陀曉日揚旌旄荒山龜背坂百里無寸毛但見古
長城突兀浮雲高馬馳亦未瘁車驅亦未勞鈴鐸聲耶
當睡夢魂搖搖官吏遠相送夾道還招邀下車一長揖
笑撫腰間刀

紅城堡

四更車鄰鄰冥行三十里連山散晨霧洶若波濤起千

車爭一途暫騁遂久止久止神爲煩齊驅意忽喜逶迤
鹽水驛渴飲漚脣齒鹽水流涓涓老樹半生死枝柯春
未青拂拂禿驢尾塵土汗童僕形變語音是白馬成驪
駒雪稜認雙耳勞苦得早休午日紅城裏

平番縣

清笳吹曉月客子初登車旌旗落風影夾路如龍蛇山
深苦寒互各自重裘加俯見山下溪春冰猶槎枒斯須
初日出黯淡迷煙沙西過大通市草舍八九家父老戀
元臣觀兵相咨嗟涕淚獻尊酒厚意應拜嘉笑我從征
夫功名願何奢飽看塞上雪孤負江南花

岔口驛

四山風颯然雲陰誤天曉山雨來未來慘慘嗚孤鳥征
馬上鞍轡吾亦朝餐飽長行四十里山多見人少但有
廢廬井處處埋荒草千村兵燹死亦或化流殍吁嗟此
邦吏子遺尙能保雲陰時聚散嫩日漏雲表澗水清淺
流人馬飲俱好車行路曲折隨山左右繞舍車便從騎
揚鞭快輕矯遙遙岔口驛敵樓望縹緲馳驅亦吾命去
去勿復道

烏梢嶺

浮沙正塊莽亂石何巒岒車輪碾石角聲作雷闐闐鐵

石怒相搏鐵敝石亦殘奈何血肉軀鬪此鐵石堅嘆息
石上痕轉輪知萬千勞人滿天地孰是無營安雪峰白
皚皚竦立浮雲端日色映愈淡風聲吹更寒烏梢傍雪
峰忽覺重裘單蕭然野草色春潤如秋乾丈夫四方志
閉戶常快然試詠從軍苦方知行路難

古浪縣

栩栩鼻聞氣蕭蕭鬚上冰山高日出晚巖岫陰寒凝下
有莊浪河波濤聲喧騰車行波濤中暗石瘦有稜坑谷
復迴合人語山爲磨鞭呼一時急危崖轉千層我馬毛
色暗骨骼空峻嶒酸嘶不肯馳瘡矣堪哀矜百里況如

洗一穀常難登吁嗟古浪吏撫字將何能

靖邊驛

雞鳴喚僮僕熟睡久不醒瞠焉立我側百語如未聽清
笳四五動征車安可停鞭笞就長道微聞嗟怨聲東方
倏已白殘星尙縱橫車行少震撼山路知漸平石盡田
可墾水近渠易成熟非膏腴壤可憐無人耕田畔且休
息飲馬溪流清僮僕語依依可念猶有情靖邊杳何處
驅馬復長行蒼騰作坐睡扶夢詢前程

涼州

萬山從西來祈連爲之宗黑河湧濤浪日夜趨而東壯

哉武威郡獨據山河雄邊士意氣奮塞馬毛骨豐時隆
將帥出赫赫干城功中原有戰鬪號令違羌戎英雄若
龍虎列郡風雲從竇公竇奇才張氏亦孤忠後來紛僭
竊猶有霸主風上相今西征吉日謁車攻軍諮任職事
息馬層城中顧盼山河勢緬懷才傑蹤

皇威萬里讐未許誇崇墉

豐樂堡

勁風合頽雲倏忽天無縫曠野春淒淒風定雲已凍驅
車石犖确垂幕雲瀕洞奇寒入倦寐飛雪潑殘夢千騎
疾如飛一一跨白鳳狂飄笳鼓溼密酒旌旗重吁嗟此

步卒瑟縮隨伴衆冰鬚易摧折墮指足悲痛復驚風振
谷忽若牛鳴甕媧皇石破碎西北天多空窮冬四時有
誰謂春方仲

永昌縣

營門風似刀寒光刺毛骨仰視長庚星明明奪殘月天
象安可誣師行有誅伐鞞刀紅抹首客子中夜發坡石
碎更利谿水溼尤滑晨光動墟落野老觀兵出塵沙埋
七竅衣垢腳不韞殷勤永昌令壺飧餉初日一飽百煖
生神情破蕭瑟頗聞白馬營夜有凍死卒伴侶荷鍤埋
萬里此生畢男兒在行伍性命真蟣蝨

水泉子

蕭蕭沙石清泠泠水泉動車行傍溪澗霜白朝寒重
窪途水灤洄高坡石森聳就夷夢易招涉險神俱竦仰視
層霄間峻嶒雪山涌遙知山左右襍沓羌人種家家牧
代耕牛羊滿高隴歲時互爲市官吏實相董好人而惡
獸仁義難開憎惟憑奉佛慈稍戢跳刀勇因俗獲治安
功亦分周孔吁嗟我有司條教去煩冗

澤雅堂詩二集卷四目錄

豐城堡

山丹縣

古城子

甘州

沙河驛

高臺縣

花牆子

鹽池驛

臨水驛

駐軍肅州

塞上曲

大風

爲丁樹芬翰題畫

所聞三首

史繩之觀察念祖席上作卽呈李兩蒼都護雲麟
送從軍出關者

北運糧行

南運糧行

西運糧行

題畫

張朗齋軍門矚賀蘭小獵圖

異時

絕句

游酒泉詩

有序

肅州東門外白骨塔

寄藍州武昌三首

鄧良甫廣元同年送華山萬年松

送人南歸

寄蕭敬父

六月十五夜

喜得子與揚州書

寄吳子常

驛亭古樹

送良甫歸省

喜官軍克復烏魯木齊各城

感事

澤雅堂詩二集卷四

烏程施補華均父著

豐城堡

握刀如把筆騎馬如乘舟書生例文弱健兒笑不休朝
發水泉子泉涸無寸流人馬並時渴曉日荒山陬官載
一車冰燥吻爭取求爽然沁肺腑致疾亦有由兩山忽
對峙中路阻且幽磊落萬石列騰擲雙輪愁停車撫健
兒爾足行道周胸中有甲兵不自持戈矛祭公方雅歌
羊叔亦輕裘健兒勿輕笑萬里知誰侯

山丹縣

產馬恨有足造車恨有輪空將萬里路老我昂藏身萬
里來山丹冰雪封蕭晨氣象嗟窮冬節序驚暮春江南
三月初東風能醉人天桃與稗柳花葉爭鮮新冉冉綺
羅裳照耀湖之濱誰家白面郎細馬驕輕塵明流瀉碧
玉軟草連芳茵墊巾一游詠蜂蜨皆情親誰令短後衣
絕塞歌從軍古來英雄士幾輩圖麒麟落日哀笳動思
鄉空愴神

古城子

西出山丹城平路沙漫漫車行得佳睡睡夢生羽翰長
風吹浩蕩飛墮陰山顛千崖震輦鼓萬帳森戈鋌山城

大合圍士馬皆騰騫誰縛白彥虎歡呼聲動天髑髏紅
漉漉怒擲營門前道左千牛羊降虜安集延指揮八城
定談笑三軍旋鈴鐸醒人夢張目何茫然方歌出塞曲
未賦銘功篇馳驅三十里古驛恣朝餐對飯忽自笑何
地無邯鄲

甘州

奇兵若風雨猛將如雷霆銜枚日夜走百里無留停元
戎陣堂堂不效偏師輕吉行五十里用以揚

皇靈高原暫結壘暇日聊休兵束縛千猪羊霍霍磨刀
聲材官帕首立宰肉均且平三軍飽而歌勇氣增縱橫

守令帳下走塵土汗冠纓簿書謝吏職芻粟供師征轅
門風震盪獨立望千營今

朝名將相白髮一書生

沙河驛

小時言弱水疑在天盡頭壯遊西萬里弱水翻東流師
行有程限一日嗟淹留五更動金鼓四野騰貔貅登車
何所見莽莽黃雲愁驚飈起飄忽怪鳥鳴鉤鞞古來爭
戰場白骨成山邱白骨化爲土鬼嘯天地秋煙塵旂獵
獵十里一戍樓病卒四五人荷戈迎道周頌言
帝神聖道與軒轅侔豁達任后牧萬里擒蚩尤

高臺縣

前年寒食節

京師蹋軟塵去年寒食節坐看泉蘭春今年寒食節師
貞隨丈人西望祈連山黯淡橫煙氛朝行白草原暮宿
黑水濱悠悠思故園忽忽當佳辰城南好風日士女多
如雲吁嗟此傭保亦戀先人墳卮酒與孟飯泣傍松楸
陳而我爲人子萬里驅征輪湖干一坏土三歲悲未親
丈夫愛遠遊匪獨妻孥瞋茫茫九原下亦恨飄蓬身歎
息復歎息且立邊庭勳高臺楊柳樹不似故園新
花牆子

躑躅復躑躅亂石傷人足獨漉復獨漉汙泥陷車軸道
途失脩治師行苦難速縣官大捉民畚鍤臨時築爲我
語縣官無爲肆鞭扑郊原春氣深草根漸回綠種麥已
及時千家策耕犢三冬多閑暇杲杲就晴旭百役俱可
興持蓋宜率督師行誠艱難民勞亦怨讟歎息述此詩
聊用責司牧

鹽池驛

隴西天下瘠百物東南來卻喜酒泉郡鹽池白皚皚赤
日薰炙成不用萬竈炊尻人爭負販亦足生活資頗聞
定遠縣汪汪花馬池精鹽出更廣民取官爲司秦隴相

依倚大臣酌其宜轉運旣饒裕一稅任所之其食土地
有無待蜀產爲況彼東二盟近傍賀蘭陲分載秦隴餘
市易尤可推富商戒專利小民歌阜財隴鹽死於隴寶
坐秦鹽私天地生美利權度須人才不見江淮商錦繡
供輿臺

臨水驛

莽莽鹽池西沙石歎枯瘠風色極天黃鹵氣浮地白鹹
傷細草根甘斷流泉脈人馬渴欲死勺水求未獲十里
復五里仰見朝日赤千羣疥駱駝遙遙轉荒磧天際有
人煙依稀認蹠迹陰山白巉巖巖岫如刻畫雪水何時

來邊氓待種麥烏喙廢敵樓馬繫舊戰格追痛黎家兵
半沒臨水驛

駐軍肅州

二萬里西域中國之外郭屹屹嘉峪關實爲中外樞酒
泉泉湧出土地良膏腴形勢扼其要
不害殘破餘西征
駐蹕節居中運偉圖矯矯熊虎士騰躍陰山隅翳昔

高宗朝準回赫天誅壯哉黃遼陽於此供轉輸亦越我
宣宗回餓重焚如

帝命盧德州轉輸同此途公今討不順事與

先朝殊前驅任撻伐後繼籌儲胥皤皤一元老帷幄宣

勤劬旋平赤谷壘復致烏孫俘公行何逶迤將涉崑崙
墟纏頭十萬衆夾道而歡呼天日久冥晦公來庶昭蘇
塞上曲

太白森森芒角出營門獨看天山月宿雁分飛殺氣高
鳴笳哀怨驚心骨磊落駝城萬矢催前驅夜半捷書來
茫茫瀚海三千里風碾胡沙作劫灰

大風

黃雲天半波濤湧驚飈震盪陰山動酒泉城外軍聲喧
千帳忽作胡蝶翻筆策烏烏吹不起硬雨著人攢萬矢
轅門老卒曾出關諸君未遇邊風顛君不見瀚海茫茫

沙怒卷人馬吹空似蓬轉

爲丁樹葵題畫

何人畫此黃山松森然鱗甲如虬龍置之箱篋走萬里
隨身白晝飛雷風酒泉行帳看奇筆雙鶴褫褫養毛質
知君仙語夜深聞千歲茯苓飢可食

所聞三首

火艦風輪日千里猶濤震蕩西南海碧眼夷人漢語工
腥臊分占滇池水絕徼干戈

聖主哀金繒弭蠻倚邊才乞援卻愧交州使水陸迢遙
貢象來

倭奴愚計古無有自引野狼逐家狗國中初去上將軍
夷船布列長崎口前歲西侵葛馬蘭今年烽火達朝鮮
執戈跳盪隨人指傀儡登場亦可憐

使臣持節歌皇華乘楂西泛歐羅巴倫登城下謁君主
要令海族尊

天家

國書鄭重夷狡譎授受更須爭禮節上介難求董混成
奸人恐有中行說

史繩之觀察念祖席上作卽呈李雨蒼都護雲麟

長嘯覽九州魁傑稀可數皇天似有情萬里驅之聚磊

磊才俱豪咄咄志多阻天意海成田人事虎爲鼠空懷
螯婦憂忍受醉尉侮真氣驚鬼神痛語出肺腑蚩尤長
竟天五夜光芒吐黃霧塞乾坤黑管起宮府千年旱魃
飛一腳商羊舞囊丸盜賊探海浪蛟鼉鼓地公分異教
天方更驕虜廈傾傷有道陸沈恨夷甫陰山四月雪飛
花拂尊俎淋漓濁酒醉慷慨雄劍撫奇哉絕塞上有此
寶與主違心從官人歸計問田父聊栖骯髒身自擇乾
淨土大婦朝餉菑長男歲當戶黃棉煖支體白菟充腸
肚奇懷付魚鳥猛氣銷農圃潛夫論再著高士傳新補
豹文甘隱霧龍氣謝噓雨王尼歎橫流陶公失環堵仕

隱嗟兩難聚散斯一撫天地爲低昂聽此尊前語

送從軍出關齋

五月南風開麥花送君出塞悲鳴笳
熊熊赤日燒流沙
流沙塊莽一千里飄忽賊蹤尋馬矢刺草青黃半生死
歸營仍著木棉裘夜行冬令朝行秋陰山積雪飛馬頭
北運糧行

歸化城南沙漠長五月駱駝猶運糧駱駝喜寒頗畏熱
皮毛脫落行道旁朝暎熊熊五十里臥伏沙中鞭不起
飢腸宛轉聊食鹽噪吻嗚嘶更求水小麥一斗價十千
駱駝運糧殊可憐借問蕭何能轉粟何如傅介觀屯田

滋泥泉邊千壘逼戰士悽悽有飢色材官勿惜駱駝疲
一飽飛騰看破賊

南運糧行

四分戎菽六胡麥關裏儲糧千萬石迢遞輸軍用百車
出關盡日聞鞭策官羸苦瘦民羸肥官車苦敝民車澤
民車已過伊吾西官車躑躅燉煌磧熱風瀚海百疫生
凍雪陰山三伏積運糧人畜還食糧去日千鈞到時百
花門出沒昭莫多更恐飢來肉不擇艱難暫飽古城軍
秋深或者糧因敵

西運糧行

宰桑諾爾流湯湯羅刹國人助運糧大麥小麥五百萬
兩紙契約言之詳千頭駱駝日負載迢迢古城途路長
開倉埽廩儘收納一半尙滯干戈旁陰山驕子太猖獗
公然劫掠勢莫當遂勞夷使寄書札要遣官軍交護防
將軍鐵騎趨北方馳驟定挫凶鋒狂會見轉輸千斛至
支離漢語求通商

題畫

蕭蕭蘆葦滄洲長野亭一角洲之旁白沙翠石色相映
瘦竹疏松秋更涼待來不來鴻雁影欲暮未暮煙波光
扁舟便向畫中住蠻觸紛爭空自忙

張朗齋軍門曜賀蘭小獵圖

錢唐將軍揮白羽身長九尺天人侶濡毫曉掣碧海鯨
關弓夜射藍田虎嵩陽百戰殄流賊河北千軍破驕虜
邊風烈烈賀蘭陰三年不惜防秋苦天圍大漠沙飛揚
河繞穹廬浪掀舞留屯已喜靜烽煙會獵無端催部伍
旌旗四合紫駟馳雲霄一點蒼鷹舉小隊初登麥梁山
前驅直度磁窑塢元熊赤豹窟宅傾狐兔紛紛那堪數
縱誇大獲比邱陵未免哀鳴向刀俎將軍行獵軍士奮
冬狩秋獮意猶古要令身手便弓刀無忘耳目隨旂鼓
如臨敵陣知將略歸譜邊聲成樂府卽今鹽澤張軍鋒

尚賴蘭山充獵戶我觀此圖識師律況有雄文如勁旅
公自爲序世事還勞用斧斨此才終合登台輔千秋遺憾及
公平絳灌能文隨陸武

異時

中外思強輔安危倚病身如何多難日又失老成人氣
折蛟龍橫心唯岳牧親異時綸閣下正論望誰伸
絕句

活水陂塘飲馬回酒泉城外麥花開斜陽返射陰山雪
六月寒光萬帳來

城頭淒切聽邊笳還把鄉心寄月華照我茗溪最深處

五更風露萬荷花

游酒泉詩

有序

丙子六月七日與客同游城東酒泉廢壘縱橫遍生
榛莽躑躅里許地益窪下叢蘆披拂茲泉在焉深止
數尺圍止盈丈而翠渟玉瀉泠然清瑩泉自穴出跳
躑如珠由下而上汨汨不絕尋其去流潑洄頗遠若
開渠引之可灌田畝不止供雅飲助清吟已也古云
泉味如酒嘗之非是殆以其清冽可以釀酒耳因賦
此詩紀之平利張雲心方牧是州嘗謂予思築亭其
上並疏濬泉脈詩尾及之欲其不日而成也

云何一泓水而有千載名瑩然荒穢中具此無限清窮
邊有佳侶野步城東晴青黃麥半熟路入田縱橫叢葦
覆洲渚蛙蚓方交鳴茲潭淨無垢令我心空明潭心一
綫起水面羣漚生羣漚復散滅澹沱波紋平下有數寸
魚掉尾時游行人影偶墮水倏忽去若驚去流如白虹
沈沈聞遠聲餘潤頗有及獨潔非所稱酒味與泉味二
者難合并豈真蒲萄醅小酌頽頽汲泉或釀酒清極
含芳馨側聞張平利丹碧營水亭老夫有新作聊代酒
泉銘

肅州東門外白骨塔

肅州東門外戰骨何纍纍傳聞陰雨夜萬鬼長嘯悲當
事心惻怛掩骼官所司兩穴斂千具建塔高崔巍頭足
亂彼此顛倒相撐持聊用避霜露安宅嗟已非我來弔
雙塔秋日無光輝鬼餒誠可憐鬼愚尤可嗤形神旣兩
判白骨知是誰白骨縱屬我淒冷安足依歲久骨爲土
烈烈風吹之飄揚化無有相依能幾時汝輩殄鋒刃抑
死塞與飢當其氣斷續慘痛良難支氣盡慘痛失追悼
復何爲正如夜夢惡夢醒還驚疑已骨不再肉死矣當
知歸生爲形骸縛爲鬼無絆羈天空任來往哀戚甯非
癡狐兔傷其類祭葬人事宜一瞬萬事畢至樂唯無知

嗟嗟塔中魂聽余吟此詩

寄藍洲武昌三首

鄉里慕仕宦疑若昇九天甯知仕宦苦正坐貧無田農
人斂手足晚臥魂怡然仕宦敢自在悲心飾歡顏簪纓
惜我喪耒耜嗟天全君家漸江側我家茗溪邊謀身千
萬策未似歸耕賢

窮居三十年心志足怡曠慨然語匡濟此念無乃妄騎
驢走風塵上書干將相磊落減昔懷婉轉赴今尙芻狗
叱已陳木雞嗟未養伸腳苦拘攣張目動悲愴爾我合
自尤身世均未諒懷思戴氏園夏雨草木暢披襟二三

子亭樹容疎放觀書競精博作賦備清壯澹衷物無忌
狂態世能量應笑簪笏人齷齪塵容抗

屯軍酒泉側鼙鼓驚春雷寒氣襲帷幕六月邊風哀羊
肉充見糧馬矢供朝炊低頭草干檄鬚眉揚黃埃天山
如白龍蜿蜒從西來雪光閃鱗甲眩曜初陽開萬里感
羈旅撫劍吟徘徊武昌在霄漢懷思心悠哉江山雄且
麗稱爾登臨才拙宦均未達勝地猶可懷君坐黃鶴樓
遠望天西陲孤雲飛斷雁應爲故人悲

鄧良甫賡元同年送華山萬年松

喬松千尺材實自徑寸始云何萬萬古徑寸常如此短

小本天姿霜柯老不死細根蟠蒼龍淺黛迎玉女鄧君
煙霞客曉蹋蒼龍尾手攜十八公西飲崑崙水愛我贈
五株移種盆盎裏養材錦紋石落蔭烏皮几太華青摩
天疑出破窗底時有山風來簸簸墮松子莊生論齊物
小大一而已但作干霄看矯矯卽奇偉况茲渺丈夫冰
霜節不改會當雷雨飛或化蛟虬起

送人南歸

我是無歸萬里身卻從萬里送歸人故園兄弟如相見
漫道征夫白髮新

妻孥別久益相親襟袖時時拂路塵豆粥芋羹無限好

王侯不換在家貧

寄蕭敬父

青雲不來白日去元髮蕭蕭半垂素虎頭燕領爾何人
功名我坐毛錐誤三年邊塞歌從軍匹馬短衣忍回顧
五湖舊宅負煙花六月陰山看雪絮故人哀我老征戰
一紙殷勤慰遲暮安知遙夜鼓鼙驚如接清談肝膽露
男兒不合章句死似我蹉跎君可悟要當雲雨隨飛龍
何苦文章飽殘蠹我今思君頻夢君夢中自識江南路
書窗燈火風搖搖春申浦上秋潮怒

六月十五夜

六月十五夜蕭然如暮秋雪欺三伏熱月抱九邊愁角
枕還鄉夢鉤簾傍水樓裁衣將寄遠刀尺未曾收

喜得子與揚州書

昨夜揚州月清光立馬看如聞孤鶴語爲念九邊寒衰
鬢陰山雪愁心弱水瀾朝來書乍到委曲問平安

寄吳子常

廿年門下才吳生實佼佼賦詩得吾清何止獲鱗爪吾
道固有大詩歌乃其小詩歌亦萬變清思中繚繞十士
九吟諷歎息眞知少吳生初墮地靈氣入懷抱肝腸久
迴薄語半心已了其自操翰一垢不能擾幽懷吐瘦

語往往關郊島昔年西子湖從余游縹緲扁舟波萬頃
坐看輕鷗矯余時高興發朗詠振蘋蓼詩成倩生寫快
筆如風掃低徊十回讀默識匠心巧秋榜復同登露白
桂華曉方兼師友樂詎計別離惱而余笑藝林此鄉未
堪老射策兩不中躍馬事征討太華十丈蓮亭亭倚天
表玉女戲其傍煙姿何宵窈濯足浩疊流晞髮崆峒杪
揚威虎士奮好亂犬戎狡破屋矢插房荒谷馬鳴阜干
村走踈踈一士憂悄悄邇來行更遠弱水渡渺瀰邊風
蕭條來殺氣奪炎燠天山縱烽火酒郡張旗旄前鋒赤
谷城突騎烏孫堡捷書天外望飛檄帳中草葡萄濁酒

酣筓吹哀音攬壯哉山河雄憊矣風霜飽從軍多慷慨
作客終潦倒成吟未貼妥積氣已盤拗激作秦聲豪變
盡吳歛嫺安得生伊吾爲我定草藁聞生亦蹭蹬飢臥
長安道相者例舉肥誰復存枯槁清詩祇獨悅肉眼未
知寶正恐俗緣重或累澄思眇爲生詠古風歲暮期相
保京洛多風塵愛惜素衣好

驛亭古樹

三百年前樹秋來風怒號深根穿地直孤幹倚天高蛇
穴雷霆鬪鷹窠牖戶牢誰令隆棟器偃蹇老亭皋

送良甫歸省

萬水千山外高堂一紙書歸心家咫尺別語野躊躇
戰伐孤兒在功名舊夢疏平生笑溫嶠容易絕衣裾
之子理歸棹清湘生暮瀾從來金印貴不換綵衣歡身
喜迎門健心餘作客寒邊庭無限事談笑爲加餐

喜官軍克復烏魯木齊各城

招搖煜煜臨西域氣壓櫓槍黯無色紅旂赭馬夜呼關
前驅已破烏城賊兒戲干戈十四年回奴久笑漢兵孱
甯知赤谷雷風鬪竟有將軍下九天

感事

寥落中原地今年禾黍荒誰能誅旱魃端合罪宏羊民

已妻孥鬻天教寇盜張煙塵黯淮水聞道擾渦陽
熒惑忽不見羣兒街市呼語言隨處變根柢本來無重
以民聽濫兼之物怪俱勝妖由樹德古訓未爲迂
鬼國黑風起飛揚東海波奮威應決戰持重又通和租
稅從今減要求比舊多屯兵兼造器當事意如何